

小鷗波館集

第一冊

小

路

史

記

重

三

二

前工部侍郎潘公神道碑

李鴻章

公諱曾瑩字申甫吳潘文恭公子也少承門軌續聞趾華蚤有嘉問以道光廿一年成進士改庶吉士授編修 宣宗皇帝以公宰相子能用儒業自進召見嘉歎廿六年以編修充雲南鄉試考官滇帥阮文達公贈詩爲道公與文恭公仍父子先後使滇試士以爲滇光寵卅年以侍讀學士充會試同考官又躡文恭公官侍講時故跡當道光之季 國家席太平久矣 天子好文公卿用儒雅雍容登進文恭公於時久錄機事作傳皇子文學尤重於 朝廷而公又以名三公家子能詩善書畫文采毫翰暉映門閥中朝名德皆慕與交游使滇行來戴文節公熙爲作飛雲覽勝之圖勝流交口歌詠之而公在清要右職亦能

其官 上每召對便殿論說未嘗不移晷也 文宗御極加禮
師傅家眷遇彌篤珍器祕物寵賚相屬遂躋三事辯厯六曹是
時文恭公尙無恙三年以侍郎充會試考官而文恭公以其年
重宴瓊林入 國朝以來太平公輔世家盛事無有比榮者焉
尋拜吏部右侍郎遭文恭公憂去官續遭母憂於是東南方用
兵有 詔在籍治團練服闋 召還朝旣上道疾作 敕且毋
行公曰吾敢以疾故苟止遂行至則命爲工部左侍郎他曹乏
使公一兼攝科場獄起辭連公子編修祖同主者危法中公
上寢不問海上戒嚴疏止出巡 上亦不以爲迂也蓋公自
宣宗時特被榮寵度次除拜及 文宗尤加任使解職居憂
上遲其至旦夕且大用繼文恭公後朝士目相語人以漢韋平

擬公矣會劇勞得疾謝歸邸弟。穆宗旣踐祚公曰吾再世受
恩先朝。今天子幼四方多難不可以疾故營自便遂力疾
起然是時人材新舊充周席位竟不獲更進用自是閒居京師
十有七載簞著自娛所爲書都廿九卷而詩尤多時時招攜故
人游詠郊畿徜徉山水閒聞其風者慨然想見嘉道人物平世
公族餘韻焉光緒四年三月以疾終年七十有一夫人同郡陸
氏賢孝嫺詩畫已而弃不爲與公同歲生同日卒子五人祖同
編修祖喜戶部郎中祖福祖楨皆殤祖保兵部郎中後公五月
卒女適內閣中書汪克昌公與鴻章先人同歲鄉舉其教習庶
吉士也鴻實與在館知公爲尤祖同以狀來請遂爲銘曰
唯才與世視屈信據執冥會蛇升雲不者泥蟠下沈淵豈此不

能獨彼賢揆元都卒遭執然不信亶視公後前有傑然起世轉
旋誰與風波成世屯隕涕寤歎念故先橋於萬安潘氏阡有永
不磨此刻文

吏部左侍郎潘公墓志銘

俞樾

公諱曾瑩字申甫別字星齋江蘇吳縣人太傅大學士潘文恭公之仲子世牒炳然可無述也道光十四年應順天鄉試中式舉人旋考補國子監學正二十一年中式進士改翰林院庶吉士散館授編修以大考翰詹名在高等遷詹事府右春坊右庶子累遷翰林院侍講學士侍讀學士光祿寺卿內閣學士吏部左侍郎公以大臣子風貌清嚴文章爾雅道光咸豐間屢蒙

召對便殿奉 命恭繕 仁宗睿皇帝神牌 恭送 孝和睿

皇后神牌升祔 太廟 聖駕謁東陵 命隨扈 臨雍 命

撰尙書講義 親耕 命從耕充雲南正考官會試同考官副

考官各一讀卷大臣三閱卷大臣五教習庶吉士者三 賜宴

賜茶 賜克食 賜玉佛玉如意及其他器用食物無算咸

豐三年文恭公重宴瓊林而公 奉 命典春官試士論榮之

俄以文恭公薨去官回籍時粵寇久踞金陵大江南北戒嚴乃

命公督辦江蘇團練公會同大吏布置周密又集貲以濟大

營兵餉設厰以待江北流民聚散亂黨禽斬其渠以安市井故

雖鎮江已陷於賊而吳中安堵及公還朝未再稭而蘇常相繼

陷延及兩浙無樂土焉公至京師授工部左侍郎公會厯署戶

禮兵刑四部侍郎至是徧厯六官矣 文廟方嚮用公而公與

權費用事者齟齬會有科場之獄株連及公之長子翰林院庶

吉士祖同禍且不測幸 上矜全得免尋 命公辦五城團防

事旣而夷人內犯諸權費用事者請 上幸熱河公與廷臣交

章爭不納公憤懣憂懼先是公在籍辦團練已積勞得疾至是益劇乃疏請解職於京寓養病同治初 天子沖齡踐祚 皇太后垂簾聽政時事方亟公曰此何時也豈吾養病時乎乃強赴 宮門請安 朝廷亦知其衰老不復煩以官守矣公學有根柢尤長於史學所著有 賜錦堂經進文稿一卷小鷗波館文鈔二卷小鷗波館駢體文鈔一卷詩鈔十二卷補鈔二卷詞鈔一卷題畫詩四卷畫識三卷畫品畫寄墨緣小錄各一卷畫以青藤白陽爲宗書則初學吳興晚學襄陽尤得其神髓配陸夫人亦知書工書畫同時女史汪小韞鐫小印以贈文曰潘江陸海性仁恕每大雨中聞門前有荷瓜果者曰清涼如此誰與讎者徒頽其肩耳命盡買之偶有兩甌墮地一甌一否顧諸子

曰汝曹識之薄者破厚者完也晚年頗信佛法光緒四年二月
既望夫人已示疾猶誦經禮佛如平時四月壬子強出至中庭
向西南膜拜共扶掖入室時公亦寢疾與夫人異室而處得南
中所寄金橘呼次子使奉其母夫人猶問汝父寢乎明日癸丑
鷄鳴時夫人卒公未之知也俄而曰天明邪祖同對曰尙早命
進飲飲已復睡日加巳亦卒公生於嘉慶十三年十一月乙丑
夫人生於是年七月癸酉至是歲皆七十有一生同年死同日
士大夫以爲美談子五人祖同翰林院庶吉士卽以科場之獄
免官者也好學能文有父風祖福殤祖喜工部虞衡司郎中祖
保兵部武選司郎中後公五月卒祖楨前卒孫七人皆卒今存
者祖壽之女二祖保之女一光緒五年巳卯十月十五日乙卯

祖同祖喜葬公與夫人於吳縣萬安橋浜以狀乞銘銘曰
古重世臣同國戚休公生相門楊班之儔弱冠登朝風舉雲搖
長承 帝眷一德允孚辰彼碩女君子好仇悅弧並設鸞鶴同
游僉曰異哉其生有由千載而下式此松楸

星齋先生家傳

敖册賢

先生姓潘氏諱曾瑩字申甫號星齋江蘇吳縣人先世由閩官歙州牧因家焉後入錢塘商籍傳二十六世至高祖閑齋公諱暄貢生取於戴曾祖貢湖公諱冕候選布政司理問取於汪祖雲浦公諱奕基附貢生由四庫館膳錄議敘州同知取於黃始由錢塘遷吳父芝軒公諱世恩乾隆壬子舉人癸丑進士由修撰官至 武英殿大學士贈太傅諡文恭 誥授光祿大夫取於謝繼取於汪納造室曰張皆封贈一品夫人自高祖父母以下以文恭公貴皆封贈光祿大夫一品夫人文恭公子四伯曾沂字功甫叔曾綬字紱庭季曾瑋字玉淦先生其仲也天資英特幼稟庭誥長從諸耆儒游於學無所不窺尤殫心經世之學

年十九爲諸生道光甲午舉順天鄉試舉人辛丑成進士改翰林院庶吉士甲辰授編修 宣廟素知先生名數召對 便

殿 咨訪移晷 御試翰詹擢列第四 文宗御宇孜孜求

治撰尙書講藝進復以廷試前列遷除不次歷官詹事府左右春坊庶子翰林院侍講學士侍讀學士光祿寺卿內閣學士兼禮部侍郎吏部左右侍郎工部左侍郎其攝官則國子監祭酒兵部右侍郎戶部刑部左侍郎工部左右侍郎其差使則國史館協修纂修功臣館纂修起居注日講官咸安宮總裁協同內閣批本稽察左翼宗學暨中書科錢法堂事務丙午雲南鄉試正考官庚戌會試同考官癸丑會試副考官宗室暨順天鄉試會試覆試閱卷大臣武殿試讀卷大臣又教習庶吉士者再殿

試讀卷者再朝考閱卷者三其錫賚則 御試 賜采段歲除
賜麇鹿 經筵則 文淵閣 賜茶 武英殿 賜燕 萬
壽慶節 賜入 同樂園觀劇至於頒玉佛玉如意冠服荷囊
尙方珍物克食諸 賜不可殫紀此先生服官受 寵之大較
也居平感荷榮遇前後上封事憂心君國知無不言 九重嘉
其忠先生亦削藁不以示人性孝友事父母四十餘年非應試
奉使未嘗一日離左右文恭公掌樞機居海淀 賜第與昆弟
更代省視以爲常太夫人常誨諸孫曰若父幼卽知愛敬其親
至於今益篤又曰自汝父使滇吾家覺少一人故事春秋闈先
期試進士出身之大小臣以備衡文選不與試者聽先生以堂
上春秋高不忍離自丙午後卽不與試暨咸豐癸丑文恭公再

讌曲江 文宗特命先生與徐恭勤邵文毅二公爲會試考官

文恭公志喜詩云卻喜新陰桃李盛小門生認老同年咸以父子濟美爲 熙朝盛事云旣居父憂在籍讀禮時粵賊盜踞金陵鎮江相繼陷蘇門戒嚴人心搖搖無甯日 朝命督治江蘇團練先生內與大府籌畫精密外鎮之以靜人心帖然因與父老謀集貲以贍饑軍軍氣益壯賊不敢逞丙辰夏蘇郡大旱日帥鄉人與當事步禱於神爲粥以養饑民萬吳俗奢麗有以力薄稽喪葬者舉馬季常傳中語諷之習俗爲之一變廣東潮人性健鬪以應募來蘇數持械淫掠城外約期舉事勢張甚弟玉詮誦得實以告卽日與郡守薛公煥密畫策夜帥兵役擒獲百九十人治如律當是時微先生發其機蘇州危矣大府聞於

朝璽書褒美薛公以此致身封圻入爲卿貳而不知由先生
兄弟導之也丁母憂服闋 召還 朝將行疾作 上聞賜休
沐數月居久之未瘳顧念國步多艱力疾入都庚申秋八月端
華載垣肅順世所稱三奸者也擁 車駕東巡都中臣民皇皇
靡所主先生與廷臣交章力爭 上亦不之罪命與諸留守王
大臣司五城團防事先生念內有權幸蠱惑強寇復憑陵於外
昕夕憂勞忠憤無所洩觸舊疾增劇恐誤 國不得已疏請去
官養疴京師然以時事艱辛報 國之心未嘗一日忘也生平
爲詩詞超軼凡近一時交游如曾賓谷煥顧南雅蕓陳石士用
光張溫和公祥吳蘭雪嵩梁陶鳧香櫟鴈詠無虛日八法由
唐宋上窺晉人自謂與華亭爲近嘗借觀元明人名畫詣日邃

戴文節公見而嘆曰神仙中人也晚歲優游綠野以楮墨自娛時攜二三朋儔游詠近郊敝車羸馬晏如也光緒四年三月三日已時以疾薨於京邸春秋七十有一取陸夫人生子五祖同翰林院庶吉士國史館協修貤封光祿大夫祖喜工部虞衡司郎中祖保兵部武選司郎中四品銜花翎祖楨殤女一適汪克昌道光己酉拔貢壬子舉人內閣侍讀銜中書孫男七殤孫女三曾孫女一著有賜錦堂經進文稿一卷小鷗波館文鈔二卷小鷗波館駢體文鈔一卷詩鈔十二卷補鈔二卷詞鈔一卷題畫詩四卷畫識三卷畫品畫寄墨緣小錄各一卷藏於家敖冊賢曰予癸丑通籍出先生門嘗侍譚讌論及廿年來同游與再傳弟子計千有餘人門牆之盛上掩韓蘇矣先生與夫人